

manganu siutuasamahlua

maru a ucani kari amihla, “mutuasamahlua ia, tuahlu ausi
tikuru sipaungua tihla’ahlu”, tam mavacangu sitakuamia kani’i,
mutuasamahlua ausi ucani mavacangu tikuru patikurani tihla’ahlu, tamucu a
cucu’u masalangusangu.

atuhlungu akuku mainimana, mairahlu matumuhlu ahlamu pulaovu
ihlaku, maru ucani mataingalu anauaku ahlamu hlitucuncuncu’ana, tam
anauaku ahlamu, kutuahlua cucu’u pititupuisana, maniki kuavacangu angatu
ia, hlipiracaucauisa tamaruai ihlaku hlipaumamainia pahlivinga, maniaku
malusapu ahla kumita suhlatu, musasasala ia, rianu takihlahlavaiku, kuamu
arupapiacikiri, ausicua kana’ana mataingalu mavacangu tukucuku,
pulaovu ihlaku micalivi matumuhlu caihli.

maru ucani aari, hlimilavaiku mucusukulu mahlukua saliaku
takuliliungu, angahli maini tamucuamu arukavacangu, marumukuamu
pasaulusu pasaulaula’u, taruacucuvungua hlamama arupakakari, ruavica
ihlaku a hlimilavau marikua tataraku pasaulusuisana pasaulaula’u,
matumuhlua ahlamu ma tataraku, ma kani’i pasamiana tamucuamu
masasangaru, taratuahlu a kana’ana, hlikuaku langica taaru ahlamu

hlitucuncuncu’ana, musa kana’ana mukakakuaisana, “kani’i,
hlitucuncuncu’ana tuahlu i uvuraisana ihlaku”, amihla pakisuahlai, kani’i
ahlamua, anauaku angatu pahlivinga, pitutua ihlaku, “kuaku avura”,
tumangicu a kana’ana, mucusukulu a hlamama pakisuahlai,
“vurimau hlimilavaui”, amihla ina’ana, “avurisana ka hlimilavau
kana’ana”, tumimahla karina rumahlau, tumangicuaku mumu.

apatiala hlimilavaua, mu’alivatu kucuatangii, mutusamahlicu a sapisa,
kucu takuliacu a tuku sapisa, pakipuhlu sapiku mutusamahlua,
mu’alivatu apululamikicu mumu tuku, arataicuamu mumu masasangaru,
rianicu cucu’u mumu pakipuhlu mutuasamahlua.

kani’i ia manganuisa’aimanai ka mutuasamahlua, ausi palalumu,
macuaku pacupucungu siutuasamahlua ia, ihlaila ma sasaruana mataingalu
mavacangu kari, siutuasamahlua tuahlu uvura cucu’u manganu, uvura
cucu’u manganu tuku hla vaasu, ihlaila ucani apasamanganu mumu, ma
kani’i sasaruanana, maci rianu umarua sipacaca umahlikua ikatumahla
cucu’u ia, ma sipacupungaku tuturu mara mataingalu mavacangu.

(文章大意 僅供參考) ※字數限 200 字

微笑的魔力

微笑像是一件華麗的衣裳，把它穿在身上，是如此動人。小時候我有個珍惜的娃娃，是姑姑送我的生日禮物，它陪伴我度過好多年。一次，表弟來家裡，發現了那個娃娃。長輩要我把玩具給他，我也委屈地哭了。姑姑說會再幫我買一個一樣的，我不甘心地送給弟弟，弟弟的臉上露出微笑，我的嘴角也不自覺上揚。

我發現微笑如此有影響力，微笑是世界上最美的語言，可以給人動力，也是一種鼓勵，這個世界若充滿笑容，肯定會變得更美好。